



*Selasa, 20 Agustus 2024*

**Ogen: Nehemia 4:14**



**"Erjuanglah"**



**K**egeluhen enda iperluken kal jiwa-jiwa si mperjuangkan si mehuli gelahna keadilan ras kebenaran banci teridah. Pemimpin si erjuang gelah Masyarakat si ipimpinna banci ngenanami kesejahteraan; anak sekolah erjuang gelahna banci lulus i bas persekolahen bage pe perkuliahen; anak perana-singuda-nguda erjuang guna ndatken si atena ngena; orang tua erjuang lako banci encukupi keperluan jabuna; kalak si sakit erjuang lako ngelawan pinakitna dingen para medis erjuang lako mpepalem pasien si itambarina; para pejuang i bas masa penjajahan erjuang lako muat mulihkan kemerdekaan si nggo irampas penjajah. Perjuangan si idalanken adi tujunna guna kiniulin tentuna banci maba ulih si mehuli ka. I bas ndalani kegeluhen enda harus tetap erjuang gelah kai si isura-suraken kita banci tersehi. I bas perjuangan iperluken pengorbanen (waktu, tenaga, materi, kesenangan rikut pe perukuren).

Bahan paksa tenengta Nehemia 4:14 pe nuratken kerna kata erjuanglah. *"Kuidah maka bangsa e mbiar, e maka kukataken man bana kerina ras pemimpin-pemimpinna, ola kam mbiar man musuh-musuhna. Inget uga belinna ras gegehna Tuhanta, e maka erjuanglah guna senina-seninata sada bangsa, guna anak-anakndu, ndeharandu ras rumahndu"*. Nabi Nehemia ngerana man bangsa Israel kerna hak si arus iperjuangkan rikut pe ras keadilan si arus itegakken. Guna ndatken hak ras keadilan arus lit perjuangan. Lit kebiaren i bas bangsa Israel e, tapi Nabi Nehemia mereken pergegeh, maka Tuhan si sembah e belinen ras gegehen asa persoalen si man alanken.

Paksa gundari enda tempa kita nggeluh i bas jaman si la pasti. Mbue kesimpang siuren, berita-berita si la tangkas megati ibegi. Perlu kal kita erjuang gelah ula talu i bas si la pasti. Erjuanglah kita mpertahanken hakta, erjuanglah kita guna keselamatan anak-anakta bage erjuanglah kita mpertahanken kinitekenta.